

UTUSAN MALAYSIA (JUMAAT) 28 FEBRUARI, M/S. 14

Kabinet Majlis Perwakilan Pelajar UPM mula operasi Isnin depan

KUALA LUMPUR 24 Feb. – Kabinet Majlis Perwakilan Pelajar (MPP), Universiti Putra Malaysia (UPM) dianggotai oleh 43 calon yang memenangi pilihan raya kampus pada 21 Februari lalu akan mula beroperasi pada Isnin depan.

Timbalan Naib Canselor Hal Ehwal

Pelajar UPM, Prof. Dr. Mohd. Fauzi Ramli berkata, pihak universiti mengekalkan keputusan pemilihan MPP pada Isnin lalu dan menolak tiga bantahan berhubung kemenangan 11 calon promahasiswa.

Tiga bantahan itu ditolak kerana dua daripadanya tidak berasas dan di

luar skop Pemilihan MPP UPM sementara satu bantahan ditolak kerana terdapat kesalahan teknikal.

“Keputusan Pilihan Raya MPP UPM membabitkan sebanyak 36 kerusi di 18 fakulti sementara tujuh wakil memenangi kerusi umum, menjadikan jumlah keseluruhan 43 kerusi.”

“Saya akan berjumpa dengan 43 wakil tersebut bagi menerangkan hal ehwal dan hala tuju yang seharusnya dimainkan oleh pemimpin mahasiswa terhadap seluruh mahasiswa UPM,” katanya.

Beliau bercakap pada sidang akhbar Karnival Kesedaran Kanser (3K)

di Dewan Besar, Pusat Kebudayaan dan Kesenian Sultan Abdul Aziz Shah UPM di sini hari ini.

Ketika diminta mengulas tindakan kira-kira 200 mahasiswa mengadakan demonstrasi di hadapan pintu masuk utama Bangunan Pentadbiran UPM semalam, Mohd. Fauzi berkata:

“Semua itu hanya salah faham. Sebenarnya, kemenangan 11 wakil promahasiswa tersebut masih sah dan pihak universiti bukan menarik balik atau menolak kemenangan mereka, tetapi menolak bantahan yang dilakukan oleh calon lain yang bertanding pada pilihan raya tersebut.”